



*Jumat, 30 Agustus 2024*  
**Ogen : Kejadin 24: 62-66**



**Pengapul**



**M**baru dengan Isak kebenen sekalak diberu si engkelengi ia kitik-kitikna nari. Isak anak si sada i bas nandena. Enggo banci ibayangkan adi anak si sada, uga kal pe tungtung keleng ate orang tuana man bana. Tapi labo kepe banci lalap ras nande, lit paksana sirang janah kematen si nirangkensa. Kesirangen e erbahansa medungu akap Isak man bana. Lanai akapna meriah, kelungunen, la akapna lit teman si banci jadi inganna nuri-nuri. Iidah Abraham perubahen si lit i bas Isak. Rutang pusuhna, lako ndarami teman si cocok man Isak. Entah mbera kari ia terapul adi enggo lit teman geluhna. Tupung ibaba Elieser sekalak diberu man Isak, meriah kal ukurna. Ialo-alona Ribka, ibabana ku kemah si nai iingani nadena, Sara. Dungna Ribka jadi ndehara Isak, erkiteken si e terapul ia aminna gia nandena enggo mate. Kerehen Ribka i bas geluh Isak erbahansa ia terapul, si ndube bagi kalak si medungu, kelungunen, eraru ate, genduari salih jadi keriahen, dem semangat ndalani kegeluhen. Ribka maba perubahen i bas geluh Isak. Ribka jadi pengapul.

Payo, ndehara e igambarkan desken anggur si meramis. Anggur e simbol keriahen, si maba kemalemen ate. Bagi kerehen Ribka ku bas kegeluhen Isak, bage min kerehenta ku bas kegeluhen jabunta. Kususna pe man perbulangenta. Si sipati biak perbulangen e, tatap ayona, perdiateken perasanna. Suasana perasan e banci saja la stabil, sung meriah sung aru ate. Sung kelungunen, perlu kal ia teman. Jadiken dirinta si mereken pengapul ras keriahen man bana. Aloken ia i bas kerina situasi geluhna. Malemen ateta i bas ia ermeriah ukur.